

Regional News Unit AIR Aizawl
Saturday, November 30, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Governor Dr. Hari Babu Kambhampati chuan kut themthiam te tan tanpuitu PM Vishwakarma chu hman tangkai anih a beisei tih a sawi.**
- **Environment Forest & Climate Change Minister Pu Lalthansangan Union minister Pu Bhupender Yadav leh mi dang te kawmin, Aizawl Zoological Park tihchangtlunna tura ruahmannate an sawiho.**
- **Rajya Sabha Deputy Chairman Harivansh chuan khawvel harsatna tawh mek hmachhawn kawngah India chuan hma a hruai mek a ti.**
- **India chuan Bangladesh sawrkar lailawk chu hnam leh sakhaw tlem zawkte himna tura theihtawpa hma la turin a ngen.**

<><><>

GOVERNOR

Governor Dr. Hari Babu Kambhampati chuan kut themthiam te tan tanpuitu PM Vishwakarma chu hman tangkai anih a beisei tih a sawi.

Nimina Aizawl Sipai Lammuala PM Vishwakarma Exhibition cum Trade Fair a tlawnah Larsap chuan Akashvani corr zawhna chhangin he thu hi a sawi a. Larsap chuan PM Vishwakarma scheme chu mi themthiamte te puihna tur a ni a ti a. A then chu thlahtute atanga kutthemthiamna inthlahchhawng an nih thu leh heng mi, an thilsiam zau taka zuarchhuak duh, mahni kea ding duhte puihna tur a ni a ti a. PM Vishwakarma hnuaiah hian kutthemthiamte chu skill training te pein sum lamah pawh puih an ni dawn a ni a ti a. Hetiang mite puih theih dan tur te inhrilhriatna pawimawh tak ni turin exhibition pawh huaihawt a nih thu sawiin hemi hmang hian mipuiin engtin nge puihna an dawn theih bakah, eng kutthemthiamna nge neih tul tih te an hre thei dawn a ni a ti.

Larsap chuan kutthemthiamte chu PM Vishwakarma hmanga an hlawhtlin theihna tur chuan bank te nena thawhho that a pawimawh a ti a, he hmuna inphochhuak te a kawmkualnaa an harsatna lian bera an sawi chu a hralhchhuahna tur, marketing bakah bul tanna tur sum a ni a ti a. Bank lamin an mamawh an phuhru tawh lo tih an lo hrilh thu a sawi ni. Larsap chuan bank ten PM Vishwakarma kaltlang emaw, PM Vishwakarma hnuaia pek theih a nih loh chuan MUDRA scheme atang pawhin cheng nuai 10 thlenga tanpui theih an ni a ti a. Heng tanpuina hmang te hian heng mi themthiamte hian hma an la thei dawn a ni a ti a. Bank ten an rawn phurpui chuan he scheme hnuaiah hian hlawhtlinna tam tak a hmuh theih dawn tih sawiin bank te chu mipuite pui zel turin a ngen a ni.

<><><>

CONGRESS VC

Mizoram Pradesh Congress Committee Sr Vice President Pu Lalnunmawia Chuaungo chuan ZPM sorkar chu Sum enkawl chungchangah an hlawhchham lailet der a ti.

Nimina Congress Party Office Congress Bhavan-ah thusawiin Pu Lalnunmawia chuan ZPM sorkarin an ti ang tia an sawi an tih loh vang leh an ti lovang an tih an tih leh si chu Sum leh pai enkawl thiamloh vang a ni a ti a, Village Council term an pawh tawi chhan ni a an sawi sum harsatna vang an tih chu chhuanlam tling a ni lo a ti a, VC term hi sawrkarin pawhtawi theihna nei mahse a duh duha a pawhseia pawhtawi theih a ni lo, a chhan leh vang mumal tak a awm tur a ni a ti.

ZPM Minister pahnihin tun hnaiah VC ten an thawhpui tha duhlo an ti a, ram leh hnam hmasawna atan VC ten thawhpui duh loh an nei ngai lo. Congress leh MNF sarkarah pawh a awm ngai lo a. Hei hi thuneihna hman diklohna, hmansualna dik tak a ni, a ti.

ZPM in SASCI sum an tih lapse chhan pawh Department ah sum an pekchhuah loh vang a ni a ti a. Sum awmsa chu Minister te chenna in chei nan te, Board Chairman hlawh atan te, tul lem lova sum tamtak an senral vang a ni tih sawiin Pu Lalnunmawia chuan Central-in State tan sum an n pek Department ah an pechhuak thei lova, State Matching Share an pe thei lova, chuvangin cheng Vaibelchhe 233 lai an ti lapse a ni, a ti.

Hei bakah hian NEEPCO chungchangah Power Minister-in thil hriatchian loh leh man loh a nei a ti a, he thu hi sawiho an huam anih chuan a inpeih reng a, hei hi thil diklo a thlen an duh loh avang leh thil dik hailan an duh vang a ni, a ti.

Pu Lalnunmawia chuan Lengpui Airport pawh Air Force kuta hlan tumna a kal zel ni a hriat a ni a ti a, Airport hi tihchangtlun zel a, tih len zel a, tih hmasawn zel tur a ni a, chumi atana rokhawlhna siam thei tur leh Airport-in hma a sawna dal theitu tur chu Indian Airforce kuta hlan a ni, a ti.



FOREST MINISTER

Environment Forest & Climate Change Minister Pu Lalthansanga chuan sorkar laipui Ministry of Environment, Forest & Climate Change minister Pu Bhupender Yadav leh MoEF&CC Official dang te kawmin, Aizawl Zoological Park tihchangtlunna tura ruahmannate an sawiho.

Aizawl Sahuan tihchangtlunna atan hian, solar power bun leh sahan chhunga kum upate tan a hman theih tur E-Vehicle dah chungchang te, Aizawl leh a chhehvel a ramsa hliam enkawlina tur Rescue & Rehabilitation Centre siam chungchang te leh Champhai a rescue centre second installment chungchang te bakah, kum 2022 hnulama Central Zoo Authority a tanga wawiini thleng a Zoo Recognition la hmuh loh chungchang te chu Minister hian a thlen a. Ministry lam atangin a tul anga an lo bawhzui ngei tur thu dawn a ni.

Pu Lalthansanga hian Power Grid Corporation of India hotute pawh kawmin, a bial chung - Aizawl East 1 Constituency a Mizoram Cancer Institute chu CSR funding atanga tih changtlun dan tur a sawi pui a. Proposal te thelut tur a ngenna leh a theih anga an lo bawhzui ngei tur thu PGCi hnen atangin dawn a ni.



MNF

MNF Senior Vice President Dr.R.Lalthangliana chuan Democracy ramah sum harsatna chhuanlama mipui thlan ngei, VC-te term pawh tawisak chu thil zahthlak tawp khawk a ni, a ti.

Nimina MNF Party Office Mizo Hnam Runah chhung inkhawm ah thusawiin Dr R Lalthangliana chuan 15th Finance Commission hnuaia post devolution PDRDG a kiam chhoh nasat tak em avangin sum harsatna a awm lo theilo a, hei hi a hma daih atanga hriat lawk vek a ni a ti a, kumtin state pawisa hmuh tur chu kum 5 hma lamah hriat lawk vek a ni tawh a, urban local body leh rural local body atana sum hmuh tur hriatlawk vek anih avangin, VC inthlan hma chhanah LAD Minister-in a sawi nen chuan a inpersan hle a ni," a ti.

VC term pawhtawi chungchangah Home Minister te, LAD Minister te, Health Minister leh Adviser to CM (Pol) thusawite hi a inang lo theuh a. Sum harsat vang tih te, thawhpui an harsa tih te, fur ruahtui tlak hma tihte an sawi dan a inanglo nuk a. Sorkar chuan a duh chuan thuneihna a nei teh reng a, amaherawhchu mipuiin duh taka an thlante hi MNF leh Congress kha chuan kan sawisa ve vak vak ngailo, a ti baw.



CONGRESS YOUTH

Congress thalai chuan Lengpui panna kawng Tlawng Lei dawh mek hnathawh muang lutuk avangin mipuiin harsatna namen lo an tawk tih sawiin nimin khan he hna thawh hi a hmunah an tlawh a,

Aizawl to Lengpui road, Sihhmui kawnga Tlawng Lui chung a Lei inngahna nawr thlenna tur kawngpui tan tlanga kaina track siam a ngaih dawn vangin Oct ni 30 atang khan thla khat chhung aw h turin lirthei eng chi mah tlan phal lohvin kawng khar turin sorkar chuan thuchhuah a siam a, hemi avang hian khualzin, mipui mamawh phurtu bakah damlo leh kuthnathawktu Aizawl, Lengpui Airport leh Mamit lam kal tur te pawh harsa takin Buichali lamah kal tir vek an ni.

Congress Thalai President Pu Laltawnliana chuan helai hmuna thawktute chu, mipui harsa zawk leh dam lo te dan an nih laiin mi hausa zawk leh awm thei zawk, motor nei tha zawkte dan an ni ve lo a ti a. Mipui veivahna senso a let engemaw zatin an sen belh zel a ngaih bakah Damlo leh khualzin te phurrit a thuahhnih nasa hle a. Hetianga mipui harsatna a thlen chung a lei dawh kai hna zawh a la ni lo leh hnathawktu mumal pawh an awm lo hi Congress thalai chuan mipui zahlohna leh ZPM sorkar leh a changtu Minister inthlahdahna dik takah a ngai a ni, an ti a ni.

Nikum October thlaa zawhfel hman tura tih chu a hun pawh sei niin kumin March 2024-a zawhfel tura tih leh a ni leh a, tun thlenga zawh theiha peih a la ni lo fo chu Mizoram PWD leh Company he lei dawhtute karah thawhona tha engmah a awm loh vang a ni an ti baw a. Hei hian a viltu Mizoram sorkar chak lohzia a tarlang a ni an ti baw.

Tlawng lei (Lengpui kawng) dawh hna hi India rama Inclined Network Arch Bridge hmasa ber tur nia ngaih a ni a. MT 432 vela rit niin metre 100-a sei tura ruahman a ni a. A zau zawng 7.5m niin lei sanna lai berah 17m a sang a ni. Lei dawh bakah hian a panna kawngpui Aizawl lamah 180m a thui leh Lengpui lamah 265.300m a thui hi an kutah a awm baw.



AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



AKASHVANI

Rajya Sabha Deputy Chairman Harivansh chuan khawvel harsatna tawh mek hmachhawn kawngah India chuan hma a hruai mek a ti. Nimina Akashvani buatsaih Dr.Rajendra Prasad Memorial Lecture 2024 ah he thu hi sawiin Pu Harivansh chuan India chu khawvel huap intelkhawmna hrang hrangah a pawimawh ber te zingah a tel tawh a ni a ti bawk. Deputy Chairman chuan Dr. Rajendra Prasad-an ram hmasawna tura a hnathawhte a tarlang bawk a ni.

He hunah hian Prasar Bharati Chief Executice Officer Gaurav Dwivedi pawhin thu sawiin Akashvani chu a din tirh atangin ramchhung mipuite aw ber a ni a ti a. CEO Dwivedi thu thehdarhna hmanraw dang nena khaikhinin Akashvani chuan a huam zau bik hle a ni a ti bawk.

He hunah hian Akashvani Director General Pragya Paliwal guar pawh a tel a ni.

Dr.Rajendra Prasad Memorial Lecture hi Decemeber ni 3 zanah tihchhuah a ni ang.



BANGLADESH

India chuan Bangladesh sawrkar lailawk chu hnam leh sakhaw tlem zawkte himna tura theihtawpa hma la turin a ngen. New Delhi-a chanchibumite a kawmnaah External Affairs Ministy thupuangtu Randhir Jaiswal chuan tuna Bangladesh thil thleng meka India dinna chu a la ngai reng a ti a. Bangladesh sawrkar chuan heng sakhua leh hnam tlem zawkte himna tura a mawhpurhna a hlen ngei tur a ni a ti a. Heng sakhaw tlem zawkte chungah tharum thawhna thleng tam zel chu ngaimawhawm a tih thu a sawi b awk a ni.



HEALTH MINISTER

Union Health Minister JP Nadda chuan PM-Ayushman Bharat Health Infrastructure Mission (PM-ABHIM) chuan ramchhunga damlo enkawlina leh hriselna lama hmasawna ruhrelte a ti changtlung dawn a ni a ti. Lok Sabha inkhawma zawhbelhna chhangin Pu nadda chuan he programme tum ber chu primary healthcare, secondary healthcare leh tertiary healthcare tha tak pek a ni a ti a. Block level ah Block Public Health Unit 3300 chuang din tum a ni a ti a. Integrated Public Health Labs 730 leh Critical Care Blocks 602 siam thar a ni dawn bawk a ni a ti. PM-Ayushman Bharat Health Infrastructure Mission (PM-ABHIM) hi central sponsored scheme niin cheng vaibelchhe sing 6 leh sang 4 ruahman a ni.

